

"Nua vas Ti a star?"

Quella domanda hai jeu udiu... sai buca contas gadas? Ed ei vegn endament a mi, la risposta che Jesus ha dau a quels che han dumandau el, nua stas Ti? Jesus ha dau per risposta: "Vegni e mirei!" (Gion 1, 39).

Jeu sai buc, cons da quels dumandaders havessan veramein temps ed interess sincer da vegnir per saver, nua e sco jeu vivel? Mo tuttina di quei bia d'in carstgaun, sco el viva, sco sia habitaziun vesa ora, sco igl ei drizzau en.



Nua mon jeu ussa a star? In mussader dalla lescha, che ha vuliu ir cun Jesus, ha retschert la risposta: "Las uolps han taunas, ed ils utschals dil tschiel han ignivs; il Fegl dil carstgaun denton ha nuot per puser siu tgau (Mt 8,20).

In tec cun la medema intenziun sco Jesus dundel en mia risposta mintgaton era il commentari vitier: "... en ina habitaziun da vacanzas. Lu sai jeu far in entir onn vacanzas!"

Na, ei vegn a dar el proxim temps veramein in tec il cuntrari che vacanzas. Mo anflau hai jeu in bien plaz "per puser miu tgau". Buca lunsch naven dalla Casa pervenda: Tier ils vischins hai jeu anflau in liug, ella via Davos-Baselgia 67A. Era il secretariat ei lu buca lunsch naven, el sesanfla ella stanza sutten ella Sentupada. L'entrada ei ella vart encunter la baselgia. Naven dils 9 d'uost vegn la Casa pervenda ad esser en quels dus loghens. L'adressa postala e la numera da telefon resta sco tochen dacheu.

Sch'ei dat cheu ni leu empau malemperneivladads sperel sin Vossa capientscha, beinvulientscha e pazienza.

Vies sur Peter

Casa pervenda da Laax

Nossa Casa pervenda sauda gleiti al vargau. La casa cun siu agen stil vegn ad untgir per far plaz ad in baghetg niev. Il temps pretenda midadas che nus savein buca retener. Aschia vegn la casa spazzada naven dils 16 d'uost 2010. La construcziun dil baghetg niev vegn a cuzzar circa in onn. Duront quei temps vegnin nus a sedar tutta breigia da possibilitar igl access tier la baselgia e tier la Sentupada schi bein sco mo pusseivel.

Il biro dalla Pleiv vegn disloccaus naven dils 9 d'uost 2010 ella Sentupada el plaun sutteran.

Esch'aviarta,

ils 12 d'uost 2010 allas 15.00h tochen las 18.00h. Per possibilitar a tuts parochians che han interess da forsa aunc salvar ina caussa u l'otra sco regurdientscha, stat la Casa pervenda aviarta. Rauba che sto vegnir demontada sa vegnir marcada. La demontascha da rauba sa succeder ils 13 d'uost allas 08.00 tochen las 18.00h ed ils 14 d'uost allas 08.00h tochen las 12.00h.



Nossadunna d'uost, dumengia suenter messa, envida la Pleiv cordialmein ad in aperitiv avon Casa pervenda.

Dieus paghi a tuttas personas che han sin ina moda u l'otra segidau e stadas activas en quella casa en favur da nossa Pleiv.

La suprapronza dalla Pleiv

Il maletg davontier: Casa pervenda da Laax

Pelegrinadi dallas pleivs Laax e Falera a Ziteil

Cordial invit per sonda, ils 21 d'uoost 2010

Ei fagess plascher sche numerus parochians prendan part al pelegrinadi tier Nossadunna da Ziteil.

Il decuors dil di ei il suandont:

- 06.20h Partenza da Falera, plaz posta
06.30h Partenza cun bus naven dil Plaun dil lag a Laax tochen a Salouf/Muntér.
Silsuenter viadi a pei sin in trutg da cuolm, (ca. 2 uras)
10.30h Survetsch divin el sanctuari da Nossadunna. Suenter messa caschun da magliar ina suppa e cumprar bubrondas, ni marena ord igl agen saccados.
13.00h Devoziun mariana

Retourn a casa.

Ils cuosts dil bus sorprendan las pleivs da Laax e Falera.

Per l'organisaziun eis ei necessari da s'annunziar tochen ils 17 d'uoost 2010 tier la nr. da telefon 081/ 921 41 12 ni 079/ 283 45 80.

Nus pelegrinein da tutt'aura a Ziteil.

Nus selegrein da passentar quei di en cuminonza cun vus tuts. Era affons e giuvenils ein cordialmein beinvegni.

La messa e la devoziun festivein da cuminonza cun nos vischins da Sagogn, Schluein e Glion.



Informaziuns per Laax

Communiun dils malsauns:

Mesjamna, ils 11-08-2010 suentermiezdi

Fiasta da nozzas

Nus gratulein cordialmein a *Patrizia Coray e Simon Hänggi* sin lur fiasta da nozzas che ha liug ils 7 d'uoost 2010 a Ladir. Possi bia cletg, ventira e la benedicziun dil Tutpussent accumpignar vus atras la veta matrimoniala.

Informaziuns per Falera

Communiun dils malsauns:

Gievgia, ils 05-08-2010 suentermiezdi

Gievgia, ils 19-08-2010 suentermiezdi

Gratulaziun per natalezi

Ils 5 d'uoost 2010 festivescha *Margaretha Chistell-Winzap* siu 80-avel anniversari. Nus admettein nossa cordiala gratulaziun e giavischein alla giubilara tut il bien, buna sanadad, bia plaschers ella veta da mintga di ed in legreivel di da fiasta.

Ils 22 d'uoost 2010 astga *prof. dr. sur Gion Darms*, oriunds da Falera e sesents a Schwyz festivar siu 80-avel natalezi. Nus gratulein cordialmein e tarmettein biars buns giavischs per ina biala ed emperneivla sera sontga en buna sanadad.

Nozzas a s. Rumetg

Nus gratulein als nozzadurs e giavischein bia cletg, ventira e la protecziun da Diu en Vossa veta matrimoniala:
ils 07 d'uoost 2010 a *Elvira Peta e Thomas Gasser*
ils 14 d'uoost 2010 a *Maria del Carmen e David Bundi*.

Fiasta dil s. Batten

Dumengia, ils 29 d'uoost 2010 retscheiva *Luana*, feglia da Raimund e Martina Blumenthal-Buchli il sogn sacrament dil Batten. Cordial beinvegni alla nova commembra da nossa Baselgia. Nus giavischein ad ella e sia famiglia la benedicziun da Diu ed il sustegn dalla cuminonza dils cartents.

FEGL PAROCHIAL Pfarrblatt LAAX – FALERA

Uost / August 2010



Uffeci parochial / Kath. Pfarramt

Via principala 68, 7031 Laax, Plevon: Sur Peter Aregger,
Tel. 081 921 41 12, E-mail: aregger.peter@bluewin.ch
Secretaria dallas pleivs: Natalia Gliott Tel. 079 283 45 80
E-mail: kath.kirche.laax@bluewin.ch
Adressa d'internet: www.pleiv-laax-falera.ch

Reformiertes Pfarramt Sagogn-Laax-Falera

Pfarrer Thorsten Minuth, Encarden 24, 7152 Sagogn.
Tel. 081 921 68 55, e-mail: minuth@kns.ch